

碑率所部赴塔什干，俄酋高弗曼收纳之。西域本回部旧地，统名土尔其斯丹，而分葱岭以西为西土耳其斯丹，喀什噶尔以东为东土耳其斯丹，即今土耳其旧时立国之名也。西域善后事宜，尤以英、俄两国为一大关键，应付亦良不易也。

初七日。礼拜。外部德尔比照会署公使傅磊斯开报武昌殴击教士一案，与湖督奏报情形绝异，盖所奏报多地方官粉饰之词。办理洋务以戒除粉饰为第一要义，而至今无能省悟。孟子曰：仁者以其所爱及所不爱；不仁者以其所不爱及其所爱。中国以粉饰为固有之常规、通行之要义，以矫诬百姓久矣，乃举以施之洋人，是谓以其所不能粉饰者强从而粉饰之，其亦不智之尤者也。即此一节，江夏县之不为良吏，亦略可知。英国驻扎瑞典领事德甫呈报瑞典高森伯尔克海青鱼复出，盖此种鱼为瑞典海中佳品，其博贺斯一部以捕此种鱼为生，不见已七十年矣。据称一千七百四十七年已渐少，一千八百零八年遂竟无之，及今（四）〔七〕十年。相与传播，以为美谈。西洋各国，事事推类考求如此。

初八日。接上海文报局十二月廿二日第六十号包封，由英国马什卜公司船递到，内意城、子瀚十二月廿日信，及唐景星、李璧臣、金眉生、曹志忠、葛振崧各信。是日，贤真阿穆斯宫殿朝会，晤赫克司里、谛拿娄。又格兰斯登带见一人，曰色尔古摩斯巴结德，云此英国第一名医也。美国公使亦带见一人，曰喀尔得洼勒尔，云旧充美国户部尚书，新自中国回者，曾出古北口游览数日，告言急盼中国派员驻扎美国。吾曰：陈太常奉使两年，至今未成行，想开春必出洋矣。喀尔得洼勒尔言：此已知之，我尚望中国派一贤能者，并派一领事驻扎旧金山，华洋民均获保全。美国公使言：渠意欲中国派令充当本国公使。喀尔得洼勒尔急止之曰：君自戏言，恐中国钦差闻之以为真。因相与一笑。马格里

为私述之。晚接俊星东、赫乐宾二信。

初九日。严又陵指驳张力臣《瀛海论》凡四谬：谓铁路数年为之不足，一夫毁之有馀，非中国所宜造，是一谬；谓机器代人力，日趋淫侈，二谬；谓舟车机器之利，后来必转薄而更废，三谬；谓中国有各国互相牵制之势，海防非所急，四谬。此皆《瀛海论》中篇语，谓之谬，良然。然力臣三论大旨，先举欧洲各国形势，次论西法之未易举行，终详与西洋交接之宜。立言之旨，固自有在。西洋制法，亦自有本末。中国大本全失，西法从何举行？勉强行之，亦徒劳耳！力臣于此，本有难言之隐，又方以是邀时誉，而于人言亦多有顾惜；其不能深知机器之用，则亦其所习本不在此也。严又陵知舟车机器之宜急行，亦未必遽为特见，高出人人也。其辟力臣论十字架及天主之名乃特妙，以为力臣之言：天主二字，流传实始东土。不识所流传者其字乎？其音乎？其字 RomanCatholic，其音则罗孟克苏力也，何处觅天主二字之谐声、会意乎？又引左季高之言：泰西有，中国不必傲以无；泰西巧，中国不必傲以拙。人既跨骏，则我不得骑驴；人既操舟，则我不得结筏。只此数语，掉（罄）〔罄〕已尽。

初十日。《得力克纳弗》新报局以格兰斯敦寓书希腊人尼克罗般得，令相助攻土耳其，格兰斯敦谓此语传自罗亚尔得，诉之德尔比。会绅阿什里亦据以诘罗亚尔得。于是议院诸绅又起而分党，附阿什里者百八十人，驳之者二百余人，于是乃止不诘。英廷议论，亦云嚣矣，而每起一议，又准人数多寡以定行止，亦恰无甚颠倒者。接上海文报局十二月廿九日第六十一号包封，由法国生达公司船递到，内惟子瀚侄十二月廿五日慈溪发来一信。

十一日。金登干自巴黎回，见示赫德电报，言兼派充法国公使。据云西历二月廿六日中历正月廿五日自京师发。盖其时天津海河